

بِسْمِ اللَّهِ الرَّحْمَنِ الرَّحِيمِ

## خواطر حول فيلم وثائقي عن نظرية التطور!

أبو المنتصر محمد شاهين التابع

عارفين نظرية التطور؟ معظم الناس بتقول إن هذه النظرية من أهم أسباب الإلحاد! تعرف عن النظرية ديه حاجة؟ ولا أنت أبيض يا ورد ولا أيه النظام؟

طب أحكيك عنها

أشهر حاجة عن النظرية هي إنها بتقول إن الإنسان أصله قرد!

النظرية فعلاً بتقول كده! بتقول إن الإنسان و القروود الحالية في عندهم جدّ مُشترك! القروود إلي كانت عايشة زمان خالص ... زمان زمان يعني ... ملايين السنين! القروود كلها بأه كانت عايشة في الشجر والحاجات إلي انتو عارفينها ديه

وبعدين في يوم من الأيام ... النظرية بتقول كده يعني ... جيه قرد من القروود ديه ... إلي هو يُعتبر جدّ الإنسان الكبير ... القرد ده قرّر إنه يبطل يعيش في الشجر! وبدأ يمشي على رجلين اتنين بس بدل أربعة! يعني النظرية بتقول ببساطة ... إن بسبب تغير ظروف معيشية مُعيّنة ... حصل تطور في أجسامنا بحيث توافق ظروفنا الجديدة ... والتطور ده بيحصل على مدار ملايين السنين ...

لغاية ما بقينا زي ما أحنا دلوقتي!

من ضمن الحاجات إلي بتقولها نظرية التطور مثلاً ...

إزاي إن يد الإنسان حالياً مُختلفة عن يد القرد إلي عايش في الشجر!

المفروض إن النظرية بتقول إن الإنسان بدأ يستخدم أدوات معينة بيده ... وكان بيمسكها بطريقة معينة ... عشان كده يد الإنسان تطورت عشان تساعد في إنه يمسك الأشياء بطريقة أفضل وأحسن! شوفتوا كلام الناس العاقلين!

النقطة الهامة بأه إلي أنا عايز أوصل لها ... من ضمن نقاط كثيرة جداً بتوضح إن نظرية التطور فيها خلل كبير جداً وحاجات كثيرة غلط العلماء مش بيقدروا يجاوبوا عليها ... النقطة ديه أنا لاحظتها لما كنت بتفرج على فيلم وثائقي عن نظرية التطور ... أيه هي النقطة ديه؟!

المفروض إن بطل الفيلم دكتوراه أحياء ... بتقول إن يد الإنسان الحالية بسبب التطور بتخليه يقدر يمسك الأشياء بشكل أفضل بكثير جداً من القرد (إلي هو المفروض ابن عمنا بحسب تعبير الدكتوراه ديه في الفيلم!) ... وراحت الدكتوراه ديه مسكت تفاحة وراحت قطمت منها قطعة زي الشتورة ...



يبدو هذا الأمر سهلاً جداً، ولكن حاول ان تقول هذا لشمبانزي

وراحت قايلة معلومة جامدة جدّي!

قالت إن القرد مش بيقدري يمسك الفاكهة زي ما الإنسان بيقدري يمسك الفاكهة ... لأن تشريح يد القرد بتوضح إن مكان إصبع الإبهام مختلف عن مكان إصبع الإبهام عند الإنسان ... وبالتالي الإنسان بيقدري يمسك أفضل من القرد! ... القرد بيحتاج يمسك الفاكهة بأديه الاتنين ... لكن الإنسان ممكن يمسك التفاحة بيد واحدة!



الشيمبانزي يمسك بقطعة الفاكهة بكلتا يديه لاكلها

السؤال هنا الخطير جداً وإلي ملوش إجابة عند أنصار نظرية التطور!

مش القرد ده بياكل فاكهة من ملايين ملايين ملايين السنين؟! ليه أيده متطورتش بحيث تلائم حياته إلي بياكل فيها فاكهة طول عمره من ملايين السنين؟ ولا القرد إلي هو الجد الأكبر للإنسان ده كان ابن محظوظة وهو بس إلي بيتطور؟

كان في برضه نقطة تانية في الفيلم الوثائقي ده

الدكتورة كانت بتقول إن في قرد من جدود الإنسان! قرّر إنه يجري! على أساس ديه فكرة مخطرتش لقرد قبله قبل كده خالص! ... ما علينا ... المهم القرد ده قرّر إنه يجري بس كان في مشكلة! أيه المشكلة ديه يا ترى؟! إن جسم القرد بيسخن بشكل كبير جداً بسبب مجهود الجري ... بس أحنا هنحتاج نجري كثير! المهم الدكتورة قالت إن القرد ده بدأ يفقد شعره أو فروته عشان يقدر يعرق بشكل فعّال ويخفّف من درجة حرارة جسمه الداخلية! ... عشان يقدر يجري أكثر من أي حيوان على كوكب الأرض ديه كلها!

لأن أي حيوان مهما كان يقدر يجري بسرعة ... لكن درجة حرارة جسمه الداخلية بتعلّ جداً فيضطر بيطلّ جري عشان جسمه يهدى شوية ... لكن الإنسان بيعرق ... وبسبب عدم وجود فروة على جسمه ... فيقدر يقلل من درجة حرارة جسمه الداخلية بشكل فعال!

السؤال اللولبي بأه في النقطة ديه هي .... هو مفيش غير جدو القرد إلي قرر يجري مسافات طويلة عشان كده هو بس إلي تطوّر؟! ليه باقي الحيوانات إلي أكيد بتجري أكثر من أي إنسان ... أو بتحتاج للجري أكثر مننا محصلهمش نفس التطور؟! برضه هو جدو القرد كان ابن محظوظة! هو الوحيد القابل للتطور!

نقاط زي كده كثير ملهاش إجابة عند أنصار نظرية التطور

أحنا كمسلمين مُتديّنين بنقول قول الله عز وجل: ﴿وَلَقَدْ كَرَّمْنَا بَنِي آدَمَ وَحَمَلْنَاهُمْ فِي الْبَرِّ وَالْبَحْرِ وَرَزَقْنَاهُمْ مِّنَ الطَّيِّبَاتِ وَفَضَّلْنَاهُمْ عَلَى كَثِيرٍ مِّمَّنْ خَلَقْنَا تَفْضِيلًا﴾ [الإسراء: ٧٠]

ربنا يهدي الضالين ... وربنا يستخدمنا في هدايتهم ... اللهم آمين

الحمد لله على نعمة الإسلام وكفى بها نعمة!